

欽定剿平三省邪匪方略

欽定剿平三省邪匪方略續編卷十二 癸亥年

五月初三日

丙申

勒保奏言賊馬元等稟報探得

賊匪兩起合夥向新寧所屬夾耳漕竄走官兵

三路進剿四面兜圍殺斃賊匪一二十名賊匪

左竄山梁經守備高星夬督率兵勇擒獲九名

滾巖跌斃四五人又有賊匪八名向茅坪陡坎

竄走經千總黎倬川等悉數生擒其餘殘匪分

路逃走官兵各有擒斬計共擒活賊五十七名
詢有龍紹周股內之偽總兵熊央奇探馬頭劉
湧定二名李顯碧股內偽先鋒孔繼隆旗手廖
文秀等四名其餘悉係積年戰手分別凌遲正
法又額勒登保前在川北剿散之賊有一起八
九十人分竄洪口當派副將蕭鳳來追剿又一
起一百餘人分竄馬鬣嶺當派副都統銜達斯

呼爾岱副將羅聲臯叅將羅思舉等追剿十二
日蕭鳳來追至梓潼廟地方遇賊竄來分兵三
面圍住殲斃賊匪十四名生擒十六名詢係靳
姓之賊靳逆分帶五~~十~~餘人先向黃連壩一路
逃遁此起內有靳逆之妻李氏僞先鋒羅克已
均被擒獲十四日探得該匪竄走碑壩適總兵
達自祥帶兵迎截該匪復由平河折竄十六日

在壩峪地方正與蕭鳳來之兵相值又擒殺賊
匪十八名僅剩賊匪三十餘人向尖梁子一帶
老林竄去又叅將陳弼探得鞍子坪老林有零
匪藏匿率領兵勇進剿殺斃賊匪二十一名生
擒一名詢係探馬頭曹元盛據供此起卽係馮
麻子宋癩子一夥之賊等語臣現嚴飭陳弼速
將此起餘匪辦完并留心余熊二逆務獲以便

遵

旨解京斷不可任其漏網又蒲尙佐等在胡家坳老
林追賊擒殺多名撲河淹斃十餘名詢據活賊
侯登舉等供稱係青號餘黨張先鋒帶了七十
餘人走後審地方去了熊姓謝姓兩總兵帶我
們四十餘人要從六昌入四川不想被拏等語
當將該犯等正法至土川境餘匪此時川北只有

蕭鳳來所追之三十餘人太平山內有達斯呼
爾岱羅聲臯等所辦之百餘人又苟朝九餘匪
百餘人尙在城口一帶老林藏匿此外零星剿
散之賊三五爲羣者統計不過百餘人臣惟有
偵探賊蹤尅期剿蒞斷不敢鬆勁遲延奏人

上命軍機大臣傳諭勒保曰勒保奏此時川北餘匪
只有蕭鳳來所追三十餘人太平山內有達斯呼

爾岱等所辦之百餘人又苟朝九餘匪百餘人在
城口一帶老林藏匿此外零星三五成羣之賊統
計不過百餘人等語是川省零匪此時祇剩三百
餘人但昨據德楞泰奏到李天林所追之賊剩有
一百二三十人已入川境又前據勒保奏蒲尙佐
帶兵截剿巫山八石坪一路由楚竄來零匪二百
餘人以上各賊並未提及殲淨則川中餘匪尙恐

不止三百餘人著勒保查明覆奏趕緊辦理現當
搜捕將竣之時無論在川在楚切不可存畛域之
見勿以轟逼出境了事

同日吳熊光奏言據房縣知縣孫捷三團練委
員王斌第各稟報有保康竄來剿散餘匪六七
十人經松尖寨首領劉朝俸傅宗貴率勇截擊
鎗斃執旗賊匪一名殺死三名餘匪竄至大崖

屋被八角寨觀音寨鄉勇截擊殺斃賊匪九人
又有保康竄來零匪四十餘人與該匪合夥經
總兵慶溥探知賊匪由松香坪奔至背夾巖據
險岫守當派遊擊馬濟盛等帶領兵勇由老林
覓路向上仰攻把總路必先爭先迎敵立殺執
旗賊匪一名衝入賊隊猝中矛傷陣亡千總海
士魁身中石傷並陣亡兵丁三名慶溥督兵趕

擊賊匪卽退入山後老林現在緊躡追擊又總
兵吉林泰追剿歸州竄匪追至保坪該匪搶佔
棲鳳垵叅領華山保等率領馬隊趕上鎗擊箭
射斃賊十四名餘匪向雙龍觀一帶奔逸現在
趕緊追剿又總兵李天林探有川匪數十名在
於巫山左家坡老林屯紮草屋之內經都司麻
光裕等乘夜冒雨進擊賊匪迎門抵拒鄉勇縱

火燒燃草屋賊匪情急擁出被鄉勇立時殺斃
十一名生擒七名燒死四名又於林內搜獲受
傷賊匪二名訊據獲賊鄧義華等供稱係青號
餘匪只有五十多人向在川楚老林往來掠食
等語當卽正法現據德楞泰來信保康零匪無
多已派呢瑪善於搜捕完竣後卽赴歸州幫同
吉林泰剿辦並探聞德楞泰已由後坪柏木一

帶向房縣南山督剿臣查呢瑪善追逐剿剩餘

匪係自北而南向興山進發吉林泰緊躡歸州
竄匪係自南而北正可夾擊集事奏入

上命軍機大臣傳諭吳熊光曰吳熊光奏各路殲擒
賊匪雖通計亦有四五十人而辦理總未淨盡現
在德楞泰在楚自必趕緊督辦吳熊光仍當嚴飭
該鎮將及地方團勇上緊協同搜捕不可玩延至

訊據獲賊鄧義華等供稱有青號餘匪五十多人
向在川楚老林往來掠食等語賊匪經官兵剿急
到處潛逃官兵等見成夥之賊業經打散其餘零
星散竄者卽不復置問往往有於摺內聲明該處
並無成隊之賊卽移兵他處具報肅清殊不知此
等散匪初或二三人或四五人似無足介意迨日
久遇別股打散之賊零星聚聚人數漸多又復出

而肆擾剿捕零匪日久未竣職此之由應於深山
老林內儘力排搜總須各山內全無賊蹤方可云
一律肅清也所有此次陣亡把總路必先等著咨
部賜恤

同日祖之望奏言

臣

接勒保覆信以現在米價

每倉石不過二兩左右加以口袋運腳每石須
銀一兩四五錢運至朝天關此時速辦統計三

兩四五錢可得一石之數若至夏令青黃不接
米價加昂江水漲發運價亦增則每石約需銀
四兩等語臣以川米運至朝天關每石不過需
銀四兩上下其自朝天關運至漢中上年辦有
章程每石亦只需銀一兩四錢有零通共每石
需銀五兩數錢即可運供漢中一帶兵食卽再
白漢中水路運至興安亦止須加銀數錢而豫

省協撥之米自陝州等屬運至潼關除糧價運費由豫省報銷不計外其自潼關陸路運至漢中照例價核計每石卽需運銀三兩七錢若再轉運興安山路崎嶇更須增費且兵糧用小米一升抵大米八合三勺核計升合運費則大米又爲撙節現在委員攜帶銀兩赴川採辦臣復督同藩司溫承惠將漢中興安之米預爲隨地

籌辦計算已可供支至六月中旬彼時川米
已接續前來而豫省又已碾小米一萬二千餘
石現亦委員赴潼關接運可以分運南山一帶
以備供應是現在各路兵糧足資挹注如果川
省米價日長卽當仍照前議

奏請由豫省續撥奏入報

聞

初八日辛丑德楞泰奏言竊臣督兵向金斗坪西

北前進途次接據副將銜沈洪遊擊曾壽等稟
報聞保康蝦蟆溪林內有零匪十數名在彼藏
匿當卽督兵前往搜捕擒獲賊匪七名殺死十
一名均已淨盡又據叅將馬文斌遊擊涂陞等
稟報賊匪五六十人遁入松子園老林兵勇趕
剿斃賊十二名生擒九名又據副將呢瑪善稟

報搜捕東湖之黃柏舖遺孽擒獲一名殺死一

名

臣

查楚境零匪惟吉林泰所追之賊較多其

餘均係數十人者且皆有重兵分投趕辦茲

臣

於二十八日督同富僧德馬瑜等趕至房縣之

彎腰樹扼住東北一帶入山剿辦查吉林泰所

追之賊已走雙龍觀

臣

正可督兵前往先行剿

洗再

臣

兵抵紅花朶時有九龍寨涂家寨寨長

蔣富涂文帶領寨勇胡曰富等來營呈繳截殺
賊匪首級十二顆據稱十八日有賊匪六七十
人由鬼厰竄來藏於鯽魚垵老林內適涂家寨
民男婦二十四名在山耕種至晚回寨忽被
賊匪由寨腳突出全行捉去涂家寨寨長涂文
將被擄百姓全行贖回涂文卽赴九龍寨商知
寨長蔣富邀約兩寨民人四十餘人於二十清

早鑽林前往開鎗打死賊匪十二名眼見帶傷者七名寨民李坤賢等直行趕殺被賊戕害當卽差弁前往查驗各屍實屬鎗斃查臣往來楚境七次惟此番見有寨民截殺賊匪實爲奮勇可嘉自應鼓勵以獎其餘寨長蔣富等各賞銀牌一面陣亡之李坤賢劉青國常建安三名給各家屬銀二兩現在零星散走之賊避兵而不

畏民似此寨洞均能固守而又勇敢殺賊該逆
自無所躲藏不能擄掠目下楚省具有成效又
副將呢瑪善稟報連日由后坪一帶搜捕在胡
家老林擒獲探馬頭張啓貴一名逃出難民二
名殺斃賊匪一名又觀音寨寨首文知科陳良
貴帶領寨勇協同搜獲賊匪一名殺斃一名只
剩零匪八九人潛逃日內即可搜拏淨盡查楚

境現在二竹房縣迤北並東湖歸州南漳保康
迤東均無賊匪除李天林原追之賊前已逼入
川境有蒲尙佐帶兵剿辦外所有楚疆只有吉
林泰所追賊匪百餘名色爾滾慶溥馬應國張
應貴等所追五六十名馬文斌等所追四五十
名各逆多向西南之興山巴東一帶奔逃均有
重兵跟追斷不能久稽時日

臣

歷年剿賊以來

從不信其投誠之說總以剿爲正辦所有楚境

零匪

臣

自應一手辦竣俟實在剷絕根株將楚

省守禦事宜佈置後再爲移師回川順路搜捕

奏入

上命軍機大臣傳諭德楞泰曰現在楚境賊匪祇剩

二百餘人內惟吉林泰所追之賊較多德楞泰現

卽親身督兵趕往將此起賊匪先行剿洗所見甚

是各逆知死亡在即總向深山老林無路處所狂奔恐山內尚有潛匿之賊德楞泰總應嚴飭將領逐處排搜至邊界一帶德楞泰已知會豐紳蒲尙佐等在沿邊搜剿亦應嚴密堵截毋任川匪一名闖入至寨民等齊心團練殺死賊匪十二名帶傷者七名實爲奮勇可嘉自應加之獎勵其陣亡寨民李坤賢劉青國常建安三名德楞泰僅各賞其

家屬銀二兩未足示勸著照鄉勇陣亡例賜卹俾各處寨勇聞知共知激勵

同日惠齡奏言竊照總兵楊芳聞都司張超被戕之信恐副將吳廷剛一路兵力稍單當卽率兵趕抵臭水溝腦探知賊匪在麻房子一帶山頭林內乘夜潛襲賊屯外委段永福黃金貴一路首先搶上賊匪猝不及防登時潰亂立斃十

餘人餘賊順梁逃逸正遇外委劉文亮曾學盛
一路壓下又殲斃賊匪七八人餘賊情急撲下
溝底狂奔復遇把總葉光明全來發等帶兵衝
入又殲斃賊匪七八人搜擒活賊宋星明等三
名訊據宋星明供稱係宋應伏的親姪投入苟
文明夥內苟文明被官兵打散我們一起三十
餘人往來林內藏躲又遇見胡大名的一起數

十人合夥前日我同旗手胡大名帶了三十六人往小西溝林邊藏伏遇見官兵搜山撲將下去胡大名先將戴翎頂的一個官員戳倒了我們也趕出戳了幾個人因有大隊官兵趕來方纔逃散今日藏在石板溝老林不料官兵猛然撲進林內這殺死穿青馬褂的就是胡大名我們多被拏住等供是此起零匪卽係戕害都司

張超之賊當將該犯等轡割示衆並設立張超等靈位將該逆等摘心致祭以慰忠魂楊方吳廷剛復分兵兩路排搜前進趕至東木河半溝又遇零匪攢聚深林據險擲石我兵三面抄擊鎗箭並施擊斃賊匪數人該匪捨死衝突向後山逃遁復經把總袁華俊等率兵趕殺又斃賊十餘名餘匪捨死滾崖而遁查山內零匪藏匿

本難得其確數茲該匪陸續東竄據沿途寨民
並官兵目擊僅有七八十人經楊芳吳廷剛等
連接兩仗共殲擒四十餘人其滾崖脫逃者約
計不過二三十人臣現飭楊芳吳廷剛等悉力
搜洗務期淨盡奏入

上命軍機大臣傳諭惠齡興奎曰陝省山內零匪剿
剩無幾經楊芳吳廷剛等分投搜捕共殲擒四十

餘人其溪崖逃脫者約計不過帶傷者二三十人
不難尅日搜洗淨盡前因甘肅有應辦地方事務
並青海有蒙古被番犯搶奪之案會降旨令惠齡
速回蘭州省城留心查辦其南山搜剿零匪事宜
專交與奎辦理該處太白山內餘匪所剩僅止二
三十人該督未起程之前業已分飭官兵全數捕
獲固屬甚善倘有一二潛藏卽交與興奎接手迅

送辨淨

同日

上諭內閣曰前因大功告成會降旨將川陝楚及河
南甘肅等省被賊近賊地方節年民欠銀糧令各
督撫查明具奏河南省被賊之唐縣泌陽內鄉新
野淅川鄧縣裕州舞陽葉縣嵩縣確山西平遂平
信陽羅山魯山郟縣寶豐息縣十九州縣嘉慶六

七等年民欠社穀一萬五百四十六石零俱著加
恩全行豁免其近賊及供應軍需最久之南陽鎮
平襄城長葛鄭縣祥符滎澤汲縣淇縣新鄉獲嘉
考城湯陰安陽武陟孟縣洛陽澠池宜陽永寧伊
陽二十一州縣嘉慶五六七等年民欠丁耗鹽課
籽種銀十七萬四千四百六兩零嘉慶元年至七
年民借未完常社漕薊穀一萬七千五百六十九

石零俱著加恩蠲免十分之五再嘉慶二三五等
年桐柏縣被賊焚燒社倉穀二千九百一十七石
零盧氏縣被焚社倉穀四千三百一十七石零該
縣等未能先事防範本應飭令賠補但念此項社
穀究係分貯四鄉被賊焚掠非常平倉可比所有
各該員應賠穀石並著加恩一體豁免

初十日
癸卯額勒登保奏言竊
臣連日仍令各路

官兵或百餘人爲一隊或數十人爲一隊在於
陝境西鄉川境太平通江周圍五六百里之內
分投搜捕自二十一起至二十六日據王兆
慶一路搜獲賊匪十二名殲斃四名田朝貴一
路搜獲賊匪七名殲斃四名叅將哈豐阿都司
李廷珍搜獲賊匪八名殲斃三名總兵九十搜
獲賊匪四名副將朱槐搜獲賊匪五名副將多

隆武搜獲賊匪二名各處寨民搜獲賊匪九名
共獲賊四十七名耳記十一副訊據獲犯內有
掌櫃孟鄒孔一名僞先鋒陳雲吉劉忠寧二名
僞總兵張自桂一名供稱均係被剿分散大半
空手潛逃日間伏匿饑餓夜間出來到處覓食
實在無處可逃至營內趙元帥近來總未見面
不知生死餘無要供嗣該匪竄至過街樓適遇

逢叅將哈豐阿搜山到破生擒二名據供係靳
元帥帶領原要到太平去今日遇官兵將我二
人拏住他們只剩三十六人不知逃往何處等
語蕭鳳來隨趕至通江漆樹垵老林殲斃賊匪
二名生擒三名訊係靳逆帶領之賊因官兵追
急又分散奔逃靳逆與冉先鋒同十餘人在此
一帶伏匿避兵等語該副將現在分兵圍搜又

通判劉星渠探聞十二灣老林有零匪出沒卽
派勇搜捕上至層巖之頂見有賊匪十餘人一
見兵至卽行分逃當斃賊匪一人生擒一名查
訊卽係靳逆股內分出之人有賊目邱姓帶領
此外各路搜山將弁現仍嚴搜臣查川北境內
現只有靳逆所帶之三十六人分散潛逃蕭鳳
來現帶兵勇一千二百名儘足剿辦且川北本

有達自祥一路官兵二千名並臬司劉清原帶

鄉勇又有臣派去通判劉星渠帶勇三百名可

以隨處搜緝是刻下通南境內及陝境邊界實

已可以放心臣現派田朝貴一路兵勇卽過後

河向東太探剿臣現在行抵太平清花溪已入

川境卽日歸集兵勇向東深入開縣一帶分投

督飭趕剿以期迅速藏功奏入

上命軍機大臣傳諭額勒登保曰川陝邊界零匪經
額勒登保督催各路將領自北向南逐處排搜現
已淨盡所辦尙好額勒登保因川東各路殘匪尙
有六七百人卽日移師向東深入開縣一帶親身
督剿惟川北境內剿剩靳逆所帶之賊三十六人
除擒殺外人數已屬無幾而合計蕭鳳來達自祥
等現留兵勇共有三千五百餘名之多不啻百倍

於賊總覺過多散竄餘匪均不過三五爲羣又何必留如許兵勇額勒登保或將川北兵勇酌留千餘名交蕭鳳來達白祥等分路搜緝其一千餘名帶往川東並將前次陝省留防兵四成內再爲酌抽以之搜捕川境各處零匪於剿辦更爲得力現在已交夏至雨水漸多恐各路鎮將以道路阻滯難於入山搜剿率以並無賊蹤具報希圖卸責額

勒登保應將派委何人專辦何處賊匪預爲登記
俟辦淨一處卽令該鎮將會同地方官各具實無
餘孽甘結以專責成如結報後再有餘孽潛出卽
查明嚴叅懲辦庶各將領及地方官自顧考成必
能竭力嚴搜迅勉奏績務於五月內將各處殘匪
一律殄除並將著名之齊國典靳士黃及戕害穆
克登布之熊老八余佐丙等按名擒獲毋任漏網

十二日

乙巳

吳熊光奏言

臣

據店子垵委員湯文

炳稟報該員率同寨首周應年等擒獲賊匪劉
世舉一名訊據供認張士虎股內偽先鋒沿途
殺人甚多昨在南漳馬良坪地方會同賊夥王
壠胡進夤夜將劉啓祥之妻謝氏弟媳楊氏同
劉啓祥幼子及弟劉啓福一家四口殺死并據
劉啓祥赴案指認甚確等情復據劉世舉供稱

上年被裹赴川曾在通江青龍寨住過數月目擊該寨之人奉張士虎爲教師並習其教此次張士虎與元帥苟正清先鋒楊青王瓏胡進等卽係糾同青龍寨民人由川赴楚滋擾並稱青龍寨相近有白虎寨四季寨又名銀絲寨一座他們寨上規矩不許別省之人前往其是否習教無由而知聽聞青龍寨人議論如各處教匪

辦完伊等亦卽歇手等語

臣

去年風聞川東川

北有二水寨假充賊匪出而搶掠之事恐傳聞未確不敢冒昧具

奏今劉世舉供詞鑿鑿但目下亦不宜急於查辦總當趕辦零匪迅速肅清則不逞之徒自不致再生反側至近日據房縣孫捷三稟報有分股零匪六七十人竄至南鄉袁杜坪經寨勇袁國

典等率勇截剿鎗斃賊匪十二名又據歸州知
州甘立朝等稟報賊匪竄至歸州白沙河在董
家坪擄得居民數人向天賜寨索換糧食不允
賊匪卽率衆攻寨經委員督率寨首董士任等
擊斃賊匪二名生擒一名賊始逃遁並乘間逃
出被裹難民四名又據竹谿縣徐如灝稟報探
有賊匪一股約百餘人由川省箐林子竄入竹

谿之孔南坪紅茶園一帶老林有提督豐紳派
兵追剿又有零匪二三十人由川省東溪河闌
入竹谿雞心嶺等情

臣

查提臣楊遇春現在豐

溪一帶搜捕正與該二處相近已札致楊遇春
與川省官兵兩路夾剿再本年春間會據司道
府等稟稱上年督撫及前司等捐備軍需賞銀
已將次用竣現在搜捕零匪正需獎勵該司道

與知府等共請捐銀一萬五千兩解營備賞
臣

竊思此項出自養廉不致有派累之事應懇
聖恩准令捐輸以遂其急公誠悃所有

恩撥賞銀卽於該司道等所捐銀兩內提還歸欵奏
入

上命軍機大臣傳諭吳熊光曰吳熊光奏此次各路
官兵寨勇等殲斃賊匪不過二三十人而竹谿地

方又有賊匪二股由川省竄入該縣與川省交界
所有各處隘口自必派有官兵防守何以任令闖
入此卽係楚省防堵不力之咎今該匪等既經竄
入吳熊光惟當飛飭鎮將等上緊追剿並知會德
楞泰遴派將領併力合擊就地殲淨勿致再令折
回又稽時日爲要又據訊獲犯劉世舉供詞其所
供川省青龍寨民人向奉張士虎爲師此次張士

虎卽糾同該寨民人赴楚滋擾並稱此外尙有白
虎寨四季寨民人是否習教亦未可知等語所供
殊難憑信該犯自揣情罪重大或造作此語希冀
暫時留贖或該匪會向青龍等三寨民人求索不
遂借此誣陷均未可定此時無論青龍等三寨民
人未必有習教之事卽使習教屬實伊等並未出
而爲匪豈可遽行查辦激成事端况曾經習教之

人如果畏法斂跡尙當置之不問朕前親製邪教
說申論甚明豈轉於寨勇等有意嚴辦乎且據劉
世舉供稱聽聞青龍寨人議論如各處教匪辦完
伊等亦卽歇手等語是此時果將各處零匪趕辦
肅清則其餘不逞之徒自不致再生反側豈有遽
派兵勇紛紛查詰之理總之此時零匪已將辦竣
其搶刦滋事抗拒官兵者無論平日習教與否均

當一律剿辦亦不必問其是否曾充鄉勇設將來
此數寨民人實有爲匪滋事之處自當隨時懲辦
該督惟當督飭將領將境內迅就肅清匪徒自可
立就消弭不得輕聽賊供以致各處傳聞轉滋疑
惑於事實屬無濟又奏該省藩臬道府等捐廉一
萬五千兩解營備賞等語上年該督撫等捐備賞
需曾經降旨諭知嗣後不必再議捐輸致開派累

之漸何以此次該司道府等復有請捐之舉卽云
此項實係出自養廉並不派累屬員但旣經捐輸
以後勢必有以用度缺乏致向屬員挪移勒索累
及百姓之事不可不防其漸况該司道府等旣於
春間稟知吳熊光自應卽時具奏請旨何以直至
此時奏及吳熊光著傳旨申飭

臣

等竊惟聖王綏靖疆宇弭亂必防其未萌

而應變在行所無事三省之民莠良不一當
邪匪滋事之日正人情浮動之時或倡作謠
言使人煽惑或潛萌反側視賊盛衰其事未
明其跡未露設因一二無稽之語不察請張
爲幻之情查辦張皇網羅深刻則人心疑懼
奸黨肆誣搆陷適墮其術中激變萌生諸意
外肅清之效恐有未能旦夕期者我

皇上明燭幾先隱消羣慝既

親製邪教說頒示中外茲因吳熊光奏及獲犯劉世

舉所供川省寨民有奉張士虎爲師隨同習

教之說又

特頒諭旨概置勿問而惟令于抗拒滋事者則不論

其習教與否一律剿除並催令迅速辦竣以

息異議所由閭閻靜而不擾人心定而不搖

轉瞬邪孽盡除凡厥庶民無反無側悉遵於
蕩平正直之途矣

十三日丙午勒保奏言近日老山伏賊均零星竄

出少者一二十人多者亦不過三四十人五六

十人爲一起臣嚴飭各鎮將逢賊卽剿茲據叅

將陳弼稟稱探得黃柏廠山頂有竄匪十餘人

當於四更進剿僅有賊六人在彼歇宿兵勇一

擁向前將賊匪六名用矛戳倒內有穿紬衫緞褂一賊傷而未死據供係僞先鋒胡朝祖前此被兵剿散與余佐斌熊老八等共有十五人同走昨晚余佐斌熊老八們九個人先走我們被官兵拏住等語陳弼又探得笋子坪有零匪潛匿當卽移兵往捕殲斃七名餘匪向菜灣亡命奔逃陳弼躡蹤緊追適有團練委員楊沛雲帶

領團勇攔截陳弼率領兵勇趕上將活賊十八
名全數擒獲查訊活賊並非余熊二逆夥黨內
有掌櫃金明高據供係湖北房縣人向在曾芝
秀一路充當掌櫃近日與唐家營的苟先鋒相
遇合夥竄來被官兵拏住又據僞先鋒苟文才
供稱係四川東鄉縣人向在唐明萬一路充當
先鋒近日纔與金掌櫃合夥共湊合二十五人

均被殲擒等語

臣

查訊悉係陳賊概行正法再

據巫山文武稟報近日湖北房縣所屬之小九

湖地方有賊數十人竄入大寧左家山老林總

兵李天林派令都司曾勝守備李連得等帶兵

追剿殲擒多名又副將馬元等探得鳳凰山有

零匪十餘人派兵勇前往搜捕搜獲活賊十七

名內有偽先鋒岳允相據供係白號王三槐餘

黨與探馬頭李麻三合夥李麻三本日被兵殲斃等語其擒獲偽先鋒之兵丁趙長一臣已照格撥銀獎賞奏入

上命軍機大臣傳諭勒保曰勒保奏稱川境餘匪僅止一二十人四五十人之股零星竄走等語此時零匪不過苟延散竄無論在楚在川總當一律掃除淨盡至所稱湖北房縣地方有賊數十人竄入

大寧左家老林業經李天林派令都司曾勝等帶
兵追剿前來等語此股賊匪既已竄至川境勒保
卽當派員帶兵迎擊正可兩面夾攻不可稍分畛
域

十五日戊申惠齡奏言竊臣接據楊芳來稟搜至

板房溝見賊匪七人團伏密箐中官兵直前撲
殺戮斃四人生擒二名其一人滾落懸崖跌斃

吳廷剛搜至螞蝗溝腦於林內搜見受傷自縊賊尸一軀卽於林箐深處查看脚蹤攀援而上直抵洞口忽有巨石擲下將兵丁一人打落崖底兵勇用矛齊向洞內直戳將賊匪五人全行殲斃現在山內不過排搜餘孽可卽交楊芳帶領木汛剿兵一手經理並留吳廷剛一路兵勇協同搜洗倘稍有疎漏未能淨盡之處惟該鎮

是問臣當卽起程出山由棧道一路馳赴甘肅
查辦番案奏入

上命軍機大臣傳諭額勒登保興奎曰南山餘孽經
官兵連次搜殺旣已擒斬殆盡卽尙有一二潛匿
之賊楊芳吳廷剛在彼搜捕儘可一手經理興奎
無庸馳赴該處接辦仍卽回至元壩子原駐地方
防堵昨據額勒登保奏帶兵行抵太平深入川境

此數日內剿捕零匪情形若何務督催各路鎮將
上緊分投剿辦勿再延緩

上又命軍機大臣傳諭祖之望曰本日據惠齡奏搜
剿南山零匪請責成總兵楊芳一手經理並留吳
廷剛一路兵勇協同剿洗已諭知與奎不必前往
接辦矣但惠齡業已起身前往甘境恐該鎮等心
存懈弛著祖之望嚴催楊芳吳廷剛等自西而東

將老林潛匿之賊櫛比排搜務祈迅速辦竣所有
搜捕情形卽著該撫查核馳奏並飭令峪口一帶
文武員弁如遇有零匪被剿緊急混作貿易行旅
希圖逃脫或遊手無藉之人假充鄉勇乘間搶掠
滋擾均當一律嚴密盤查以淨根株而防偷逸